

Uunga siunnersuut: Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaata allanngortinneqarneranik Inatsisartut inatsisaat (Ilinnartitaanermut, Kultureqarnermut, Timersornermut Ilageeqarnermullu Naalakkersuisoq)

Akissuteqaat

(Ilinnartitaanermut, Kultureqarnermut, Timersornermut Ilageeqarnermullu Naalakkersuisoq)

Pingajussaaneerinnineq

Kultureqarnermut, Ilinnartitaanermut, Iisimatusarnermut Ilageeqarnermullu Ataatsimiititaliap sukumiisumik ilassutitut isumaliutissiisuteqarneranut Naalakkersuisut sinnerlugit qujassuteqarniarponga.

Ataatsimiititaliap isumaqatigiittup siunnersuutip akuersissutigineqarsinnaanik inassuteqaateqarnera Naalakkersuisut naammagisimaarlugu maluginiarpaat.

Inuussutissarsiutinik ilinniartitsinerit pillugit inatsimmi atuuttumi sungiusarluni suliffissamik nassaarniarnissaq ilinniartut ataasiakkaat ilinniakkamik ingerlatsinerminni nammineerlutik akisussaaffigaat, aamma suliffeqarfiit attaviginerisigut sungiusarluni suliffissanik sapinngisamik amerlanerpaanik pissarsinissaq qitiusumik ilinniarfiit pisussaaffigaat. Soorlu aamma ilassutitut isumaliutissiisummi taaneqartut inuussutissarsiutinik ilinniartitsinerit pillugit inatsisip atuuttup sungiusarluni suliffissat amerlanerusut kissaatigineqartut pilersissinnaasimangilai. Aamma inatsit aqutugalugu inuusuttut angusaqarfigiumasat meeqqat atuarfiannit toqqaannartumik ilinniagaqalersinnaanissaat inatsit aqutugalugu iluatsissimangilaq. Tamannalu Naalakkersuisut allanngortikkusuppaat.

Inuusuttut qaamasumik siunissaqaqqullugit sapinngisamik amerlanerpaat ilinniagaqalernissaat Naalakkersuisunut pingaaruteqarluinnarpoq. Tamatuminnalu pisariaqanngitsumik pinngitsoortitsisartut peerneqarnissaat Naalakkersuisut pingartippaat.

Tassunga atatillugu inuussutissarsiutinik ilinniartitsinerit pillugit inatsisip atuuttup misissoqqinneqarneranik suliaq Naalakkersuisut aallartippaat, inuussutissarsiutinillu ilinniartitsinerit pillugit inatsisip naliliiffigineqarnera pillugu Ataatsimiititaliap ilisimatinneqarnissamik kissaateqarnera naammassissallugu.

Ataatsimiititaliamut qujassuteqarnerup saniatigut partiit tamarmik siunnersuummut tapersiisuteqarnerat pillugu Naalakkersuisut qutsavigerusuppaat.

Taamatut oqaaseqarlunga siunnersuutip akuersissutigineqarnissaa Naalakkersuisut innersuussutigaa.